

Patrick Croes, habitante y lider scout di Paradera ta impresiona cu MFA



ORANJESTAD (AAN): Patrick Croes ta conoci den e comunidad di Paradera como e

lider di Grupo Scout Casibari, un di e orguyonan di e bario. Pensando riba su muchanan y riba su conciudadanonan, Patrick a pone su mes na disposicion di 'Bos di Paradera'. Esaki ta e grupo di habitantenan cu ta asisti directiva di MFA Paradera den su funcion, comunicado e deseo y situacionnan di e bisindario cu tin mester di atencion.

"E ta un tremendo 'oportunidad' pa trece ideanan dilanti pa loke ta e bario y necesidadnan cu tin. Di e manera ey mi a worde acerca y gustosamente mi a acepta pa ta miembro di klankbordgroep Paradera," Croes a splica. Diamars anochi el a ricibi for di man di Prome Minister Mike Eman, e Decreto Ministerial cu ta haci'e un miembro oficial di e grupo, cu ta yama 'Bos di Paradera.'

Mescos cu e otro miembronan, Croes ta masha contento cu diahuebs awo ta e apertura oficial di MFA Paradera. "E ta hopi great; sigur ta un luga hopi bunita, espacioso cu hopi posibilidad. Ya caba tin hopi idea den mi cabes pa cu scouting; kico tur nos por haci, of kico tur e luga aki por nifica pa cu Scouting Aruba en general, dus e ta un tremendo idea."

Bos di Paradera a stipula caba cu ta bay cuminsa na reuni mas cu un biaha pa luna pa asina 'brainstorm' y djey, poco-poco, presenta e ideanan y ehecuta nan. Croes ta comparti e vision di Gabinete Mike Eman cu MFA mester ta un luga pa trece hende hunto, pa ideanan bin dilanti, tur cos cu tin di haci cu arte, cultura. "Un luga central cu e bario di Paradera por uza; dus hopi great e pensamiento su tras," asina el a indica.

Patrick Croes ta invita tur habitante di Paradera y bisindario pa bin diahuebs anochi na e apertura oficial. "Bin conoce MFA Paradera!" Programa ta cuminsa pa 6:30 di atardi y ta inclui presentacion di poesia, canto y gaita di artistanan di e propio bario.